

C'EST DÈ L'DYNAMITE !

Couplets chantés par HARZÉ

Joueie à l'Société d'Emulation, à Lige

Nos borgeus viket so des spène,
(On n'ètind pus rin dire di bon)
Racontant qui n's ârans famène,
L'anarchie ou l'rèvolution !
I n'jâset pus qui d'dynamite,
Et tot rintrant si s'trèbouhet
So n'cokmâr, on cou d'veie marmite,
Tot fant d'meie tour, i d'het : C'enn est !

Ine ovri, li samaine passeie,
Conte on meur esteut accropiou,
Rowe dè Parc, tot près dè l'Bovreie,
D'aller pus lon, n'âreut polou ;
Min l'patroye qui fève si siervisse
Si dotant qu'mettève ine saqwet,
Si dèrit : C'est ine anarchisse
Allans vèi, mutoè qu'c'enn est.

Qwand nost homme à lon fout èvôye,
Les agents avou précaution
Allit veie, tot sùvant n'longue rôie
Et so l'côp fit n'constatation ;
Corant vite amon l'Commissaire
I li d'hît : — « Vinez veie çou qu'est !
» Po nos autes, nos n'è dotant waire,
» Et nos wag'rî po gros qu'c'enn est. »

L'Commissaire tot prindant n'longue sâbe
Si dèrit : — J'n'irè nin trop lon,
Et d'manda, tot s'sèchant po l'bâbe,
Li couleur d'affaire en question ;
— « I fève nute qwand n's'estis-t-è l'rowe
» Nos n'l'avans nin louki d'trop prè ! »
Li Commissaire, tot fant n'laide mowe,
D'ha : — « J'n'è dote nin, sûr qui c'enn est !

— « Corez vite à bureau d'polisse,
» Alléze so l'côp prév'ni Mignon,
» Dihez-li qu' n'a des anarchisse
» Vès l'jârdin d'Acclimatation. »
L'Commissaire, frottant ses lunettes,
Accora, mins n'dèrit wai d'choè !
— « Ji veus bin çou qu'on a stu mette,
» Mins j'a l'vue basse po dire c'enn est.

» S'on allève houki l'Borguimaisse,
» I direut çou qu'est so l'côp,
» I veureut mutoè rin qu'à l'caisse
» Si c'est d'Ombret ou bin d'à Trô ;
» Corez vite jusqu'à l'Maison d'Veie,
» Dihez-li qu'prinsse Ghinijonet,
» A leu deux i poront mîx veie
» Si c'enn n'est nin, ou si c'enn est. »

Nost mayeur, qu'est ine bonne pâce d'homme
Esteut revôe dépôe longtims,
Et pettève bin pâhul'mint s'somme
Qwand l'police prév'na totes ses gins.
I s'moussa et prindant n'voèture,
Accora, qu'fève neur comme è boè.
I dèrit : — « C'est bien sa nature
» A l'odorat, j'crois que c'en est.

» Mais ceci n'est pas mon affaire
» Prévenez l'Procureur du Roi,
» C'est de la police judiciaire
» Et je n'ai rien voir à c'la. »
On alla râyi les sonnettes,
On cora dispièter l'Parquet,
Turtos essône, i fit n'enquête,
Leu conclusion esteut qu' c'enn est.

Il esteut à pau près cinq heûres
Qu'on signève li procès-verbâl,
On vèyève dè jou les aïreures.
Et passer les nèttiens d'canâl ;
On bossou què k'mande li k'pagneie
D'on côp d'ramon hova l'paquet !...
Dè s'sâver, i fallève les veie,
Tos les cis qu'avît dit : C'enn est.

Li leddimain, ci fout n' affaire,
Qwand on d'ha çou qu's'aveut passé,
On n'jâsève qui dè Commissaire,
Des agents qu'avît constaté ;
On allève louki l'plèce à meur,
On mostrève dè l'mèche li trajet !...
Et l'mohonne a tos les bonheur
Dépôie qu'on sèt oûie qui c'enn est.

G. Th.